



Publicaziuns dalla vischnaunca, jamna 47

Seivs mobilas per la pasculaziun

Tenor art. 75, al. 1 dalla lescha da baghegiar ston seivs mobilas vegnir allontanadas immediatmein suenter la pasculaziun. Quei vala era per seivs da gatter.

Las seivs buc allontanadas vegnan pridas naven senza avisar ils pertuccai sin donn e cuost dil proprietari da terren.

Nus supplichein da prender enconuschientscha da quei fatg e d'instradar las mesiras prescettas.

Disentis/Mustér, november 2017

Uffeci da baghegiar

Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica. Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu). Quellas lavurs ston esser finidas sil pli tard entochen la **fin da november 2017**. En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietari.

Uffeci da baghegiar Disentis/Mustér

Cussegl da vischnaunca

Rapport dalla seduta dils 16-11-2017

En sia seduta dils 16 da november 2017 ha il cussegl da vischnaunca, sut il tgamun da Christoph Berger, tractau il preventiv 2018.

La tractaziun dil preventiv 2018 ei vegnida tgamunada dil vicepresidente Armin Manetsch. Il quen da gudogn e sperdita preveda expensas da 14.32 milliuns francs ed entradas da 14,94 milliuns francs. Ordlunder seresulta in surpli d'entradas da frs. 624393.–

En cumparegliaziun cul preventiv 2017 dil quen da gudogn e sperdita croda en egl che aschibein ils cuosts sco era ils recavs s'augmentan per varga frs. 200000.–. Quei ha d'ina vart da far cul niev model da quen (HRM2), nua che las amortisaziuns vegnan fatgas linearmein. Da l'autra vart cuntegn il preventiv 2018 dapli cuosts e recavs en connex culs donns d'uau entras il bau-scorsa ed in augment tiels cuosts da personal. Igl onn 2018 ein previdas investiziuns bruttas da bunamein 8,5 milliuns francs. Oravontut entras las contribuziuns da privats, cantun e confederaziun per segirar la Val Acletta e dislocar la Via Acletta sedattan la finala investiziuns nettas da biebein 3,14 milliuns francs. Dallyas investiziuns nettas da rodund 3,14 milliuns francs pertuccan rodund frs. 730000.– las vias cantunalas e communalas ed 1,7 milliuns francs la dismessa e purificaziun dall'aua (canalisaziuns e sereneras). Per projects forestals (stretg Faltscharidas, plontaziuns e lavi-neras en Val Clavaniev sco era il slargiament e rinforzament dalla via d'uau Brulf-Fontanivas) ei previu d'investar netto frs. 411000.–. Il cash-flow ei cun 1,023 milliuns francs cuntenteivels.

Il cussegl da vischnaunca ha suenter ina buna e fundada discussiun approbau unanimamein il preventiv 2018 sco era fixau il pei da taglia sin entradas e facultad sin 120% e la taglia sin schischom sin 1,7‰ (sco entochen dacheu).

Il preventiv 2018 vegn suttamess al referendum facultativ.

Suprastonza communal

Referendum facultativ

A caschun da sia seduta dils 16 da november 2017 ha il cussegl da vischnaunca approbau unanimamein il preventiv 2018.

Conform ad art. 21, lit. a dalla constituziun communal ei quella decisiun suttamessa al referendum facultativ. Il messadi tiel preventiv 2018 (incl. annexas) ei exponius per investa en casa communal (stanza nr. 10).



Enteifer 20 dis dapi la publicaziun officiala han 80 votants la pusseivladad d'inoltrar enviers sura conclus il referendum e pretender ina votaziun dil pievel.

Suprastonza communal

Sera d'informaziun publica

Hotel «Acla da Fontauna» e Center da sport e cultura – Venderdis, ils 12 da schaner 2018 allas 20.00 ha liug el Center da sport e cultura in'informaziun publica davart dus fetg impurtants projects per nosa vischnaunca. Nus supplichein da reservar quei termin per schar informar ord εμπrem maun davart il stan da planisar il hotel «Acla da Fontauna» ed il Center da sport e cultura. Suententer l'orientaziun vegn purschiu in aperitiv, durant il qual nus selegrein da far cun tuts presents in viva sigl onn niev e sin in empermettent futur da nosa vischnaunca.

Suprastonza communal

Vischinadi Segnas/Mumpé Tujetsch

Invitaziun alla radunonza generala da **sonda, ils 2 da december 2017** allas 19.30 ell'ustria «Cresta» a Segnas

Tractandas

1. beinvegni
2. elecziun dad in dumbravuschs
3. prelecziun ed approbaziun dil protocol
4. orientaziun president
5. rendaquen e rapport dils revisurs
6. fixar tscheins per diever zona
7. program da lavur
8. deliberaziun da damondas e propostas
9. varia

Cordialmein envida

la suprastonza dil vischinadi Segnas/Mumpé Tujetsch

Suententer la radunonza ha liug la radunonza generala Uniun da Cascharia e Fuorn Segnas.

Uniun da Cascharia e Fuorn Segnas

Invitaziun alla radunonza generala da **sonda, ils 2 da december 2017**, allas 20.30 suenter la radunonza da vischins ell'ustria «Cresta» a Segnas

Tractandas

Beinvegni

1. Elecziun da dus dumbravuschs
2. Prelecziun ed approbaziun dil davos protocol
3. Rapport dil president
4. Proceder futur cun il fatg dall'uniun
5. Prender decisiuns sin ulteriuras propostas
6. Varia

A stedia participaziun envida Vossa suprastonza.

Il president, Edwin Deflorin



Schafwoll-Annahme Herbst 2017

Ilanz **Samstag 25.11.2017**, 13 bis 15 Uhr Werkhof Ilanz

Disentis **Samstag, 2.12.2017**, 9 bis 11 Uhr Barit Baubedarf Segnas

Historias – Versets – Giugs da detta

Mesjamna, ils 29 da november 2017 dallas 9.00–9.30 per mummas ed affons pigns entochen treis onns. Vegni e tedlei versets, historias ni giugs da detta pils pigns. Tier nus anfleis Vus cudischs, films e portatuns per l'entira famiglia.

Cun ils pli cars salids e sin seveser tochen gleiti.

Maxi, la tartaruga ed il team

dalla Biblioteca popolare Disentis/Mustér e contuorn

Uniun da dunnas Disentis/Mustér

Fiera da Nadal, sonda, ils 25 da november 2017 dallas 13.30–20.00

Stans: Nus selegrein da far in beinvegni a varga 40 expositurs/-as. Ils stans vegnan endrizzai sil plaz scola, sil plaz avon halla Cons sco era sil plaz avon il Center da sanadad Puntreis. Durent il temps d'exposiziun ei la via Cons serrada per il traffic naven dalla fatschenta Arco entochen ils parcadis visavi la baselgia S. Gions.

Zambergiar latiarnas 14.00–16.30 (Til da latiarnas 17.30). Ensemen cun ils affons zambregian nossas dunnas dil ressort affons latiarnas el Center da sanadad Puntreis. Allas 17.30 suonda il til da latiarnas per in e scadin.

Aunghel da Nadal: Cun quella acziun vulein nus dunnas sustener personas basignusas el cantun Grischun. Commembras da noss'uniun han zambergiu cun gronda premura aunghellets. Bugen fagein in beinvegni a Vus sin nies stan. Engraziel fetg per Vies sustegn!

Ustria: Durent il temps da fiera ei l'ustria en halla Cons aviarta. Sper bubrondas purschin nus era pettas, suppa da giutta e hot dogs. Vegni e gudi in per bialas uras – nus selegrein sin Vossa viseta.

Uniun da dunnas Disentis/Mustér

Gruppa da seruschnar/termagliar

La gruppa da seruschnar/termagliar dat la caschun als affons pigns ed als geniturs da s'entupar, paterlar e termagliar. Tut ils affons entochen treis onns (cun fargliuns e geniturs) ein cordialmein beinvegni allas sentupadas meinsilas.

Las sentupadas duessen plinavon era far queidas als affons da visitar pli tard la gruppa da termagliar Artgin che ha liug el medem local nua ch'ils affons stattan persuls duas uras cun las menadras, e quei inaga ad jamna. Pils affons eis ei sco d'entrar ella tiara dalla cucagna cun massa novs termagls, e tut quei da cumpignia. Vegni e mirei, nus selegrein sin vossa viseta.

Proxima sentupada: **mardis, ils 28 da november 2017**

Temps: 14.30–16.00

Liug: Casa da scola Segnas, local Artgin, ella emprema alzada

Prender cun: marena e scalfins

Ulteriuras informaziuns e datums anfleis Vus sut www.uddm.ch

Cordialmein envida *Uniun da dunnas, ressort affons*



Fiera da Nadal – La biblioteca ei aviarta

A caschun dalla fiera da Nadal **sonda, ils 25 da november 2017**, ei la Biblioteca populara Disentis/Mustér e contuorn aviarta dallas 14.00–16.00. Nus presentein nossas medias per advent e Nadal en in contuorn pascheivel, e la decoraziun cun lavurs da zambergiar d'affons dalla scola da Mustér procuran per in'atmosfera da Nadal per quell'exposiziun.

Encuris vus aunc ideas per in schenghetg? Cun in abbonament digl onn per famiglias (50.–) ni persunas singulas (30.–) da nossa biblioteca regaleis vus in entir onn plascher.

Nus selegrein sin vossa viseta en nossa biblioteca.

Il team dalla biblioteca

Uniun purila Mustér

Radunonza generala, **venderdis, ils 24 da november 2017** allas 20.15 en cafeteria dil Center da sport e cultura Mustér.

Cordialmein envida la suprastonza.

Acziun da spender saung

L'acziun da spender saung per donaturas e donaturs dallas vischnauncas da Medel e Mustér ha liug **gliendis, ils 27 da november 2017** dallas 18.00–20.00 en halla Cons. Nus engraziein grondamein per quei bien survetsch en favur da malsauns e disgraziai e sperein sin ina stedia participaziun.

Uniun samaritana Mustér

Sontgaclau 2017

Sonda, ils 9 da december 2017 viseta il Sontgaclau Vitg las famiglias dalla fracziun Vitg.

- 13.30 viseta ellas ustrias dil vitg
- 15.30 messa da Sontgaclau, baselgia parochiala s.Gions
- 16.30 sentupada cun Sontgaclau avon l'ustria «La Furca»

Silsuenter viseta dil Sontgaclau da vitg ellas casadas. Il Sontgaclau viseta era uonn bugen vus a casa. Vossa annunzia per mail sontgaclauvitg@hotmail.com ni per posta Sontgaclau Vitg 2017, Posta, 7180 Mustér fagess a nus grond plascher. Cordials salids

Uniun da giuventetgna Mustér, fracziun Vitg
